

EXCMO. CONCELLO DE VILALBA

ORDENANZA XERAL DE PROTECCIÓN  
DO MEDIO AMBIENTE URBANO

## **PREÁMBULO**

Nos nosos días a protección do medio ambiente constitúe unha preocupación unánime sentida por todas as esferas da Administración e da xeneralidade dos cidadáns. En harmonía con este principio básico, o artigo 45 da nosa Constitución proclama o dereito que todos temos a gozar dun medio ambiente adecuado para o desenvolvemento da persoa e, en paralelo, o deber que tamén alcanza a todos de conservalo. O mesmo artigo sinala como obriga dos Poderes Públicos a de velar pola utilización racional dos recursos naturais coa fin de protexer e de mellorar a calidade de vida e defender e restaurar o medio ambiente.

## **LIBRO I**

### **PROTECCIÓN DA ATMOSFERA FRONTE Á CONTAMINACIÓN POR FORMAS DE ENERXÍA**

#### ***TÍTULO PRELIMINAR***

##### ***ARTIGO 1***

A presente Ordenanza ten por obxecto regular, no ámbito de competencias municipais, as actividades, situacións e instalacións que sexan susceptibles de influír nas condicións ambientais propias a que se refire a Ordenanza no termo municipal de Vilalba, coa fin de preservar e mellorar o medio urbano, evitando os posibles efectos nocivos daquelas.

##### ***ARTIGO 2***

Cando existan regulacións específicas de rango superior, as prescricións desta Ordenanza han aplicarse con suxeición ó *Principio de Xerarquía das Normas* e como complemento daquelas.

##### ***ARTIGO 3***

O incumprimento e a inobservancia do disposto na presente Ordenanza quedará suxeito ó réxime sancionador que se articula nela.

##### ***ARTIGO 4***

A competencia municipal que regula esta Ordenanza será exercitada polo alcalde, quen pode delegar na Comisión de Goberno.

## **TÍTULO I.**

### **PERTURBACIÓNS POR RUÍDOS**

#### **ARTIGO 5**

1. A intervención municipal nestas materias tenderá a conseguir que as perturbacións por formas de enerxía no excedan dos límites que se indican na presente Ordenanza.
2. Os ruídos e sons mediranse en decibelios ponderados, de acordo coa escala normalizada A (dBA), e o illamento acústico en decibelios (dB).
3. No caso de que manifestamente non se podan medir tecnicamente os ruídos e sons ha seguirse, en casos urxentes, o criterio dos axentes municipais.

#### **ARTIGO 6**

No medio ambiente exterior non se poderá producir ningún ruído que sobrepase os niveis indicados de seguido.

<b>Situación actividade</b>	<b>Niveis máximos en dBa</b>	
	<b>Día</b>	<b>Noite</b>
A) Zona con equipamento sanitario	45	35
B) Zona de residencia, servizos terciarios, non comerciais	55	45
C) Zona con actividades comerciais	65	55
D) Zona con actividades industriais ou servizos urbanos agás servizos da Administración	70	55

Enténdese por día o período comprendido entre as 8 e as 22 h.

#### **ARTIGO 7**

Por razóns da organización de actos con especial proxección oficial, cultural, relixiosa ou de natureza análoga, o Concello poderá adoptar as medidas necesarias para modificar, con carácter temporal, os niveis sinalados no parágrafo primeiro nas vías ou sectores afectados no dito parágrafo primeiro.

## **ARTIGO 8**

1. Para os establecementos ou actividades que se citan neste parágrafo, o nivel de ruídos transmitidos a elas dende o exterior dos mesmos, agás os orixinados polo tráfico, no superarán os límites seguintes:

<b>SITUACIÓN ACTIVIDADE</b>	<b>NIVELES MÁXIMOS EN dBA</b>	
	<b>DÍA</b>	<b>NOITE</b>
A) Equipamento sanitario e benestar social.	30	25
B) Equipamento cultural, relixioso e educativo.	35	30
C) Equipamento para o lecer.	40	40
D) <b>SERVICIOS TERCIARIOS</b>		
- Hospedaxe	40	30
- Oficinas	45	-
- Comercio	55	55
E) <b>RESIDENCIAL</b>		
- Pezas habitables agás cociñas	35	30
- Paseos, aseos e cociñas	40	35
- Zonas de acceso común	50	40

2. Os niveis anteriores aplicaranse tamén ós establecementos abertos ó público non mencionados, atendendo a valores de analoxía funcional ou de equivalente necesidade de protección acústica.
3. Os titulares das actividades estarán obrigados a adoptar as medidas de illamento e de acondicionamento necesarios para evitar que o nivel de ruído existente neles perturbe o adecuado desenvolvemento destas e ocasionen molestia ós asistentes.
4. Tamén se prohíbe a transmisión desde o interior de recintos ó exterior de niveis sonoros que superen os indicados no artigo 6º, e ó interior dos locais lindantes de niveis sonoros superiores ós indicados no apartado 1º deste artigo.
5. Prohíbese o traballo diúrno e nocturno a partir das 23 h deica as 6 h nos establecementos emprazados en edificios de vivendas ou lindantes con elas, cando o nivel sonoro transmitido a aquelas exceda dos límites indicados neste artigo.

## **ARTIGO 9**

Para os efectos dos lindes fixados no artigo 6º, sobre protección do ambiente exterior, en todas as edificacións de nova construción os cerramentos deberán posuír o illamento acústico mínimo esixido polas normas básicas da edificación e as que desenvolvan as normas urbanísticas.

## **ARTIGO 10**

1. Os elementos constructivos e de insonorización de que se dote ós recintos onde se aloxen actividades ou instalacións industriais, comerciais e de servizo, deberán posuír o illamento suplementario e preciso, para evitar a transmisión ó exterior ou ó interior doutras dependencias ou locais, de exceso de nivel sonoro que se orixinen no seu interior, e mesmo, se fose preciso, dispoñerán do sistema de aireación inducida ou forzada que permita o peche de ocos ou ventás existentes ou proxectadas.
2. Nos locais nos que se superen os 79 DBA de nivel de emisión, o illamento dos cerramentos que os separen e linden con vivendas, non poderá ser en ningún caso inferior a 50 DBA.
3. Os aparellos elevadores, as instalacións de acondicionamento do aire e as súas torres de refrixeración, a distribución e evacuación das augas, a transformación de enerxía eléctrica e demais servizos do edificio, serán instalados coas precaucións de emprazamento e illamento que garanten un nivel de transmisión sonora non superior ós límites máximos autorizados polo artigo 8º cara ó interior da edificación.

## **ARTIGO 11**

Todo vehículo de tracción mecánica deberá ter en boas condicións de funcionamento o motor, a transmisión, carrozaría e demais elementos deste capaces de producir ruídos e vibracións, e especialmente o dispositivo silenciador dos gases de escape, coa fin de que o nivel sonoro emitido polo vehículo ó circular ou co motor en marcha, non exceda os límites que establece a presente Ordenanza.

## **ARTIGO 12**

Prohíbese a circulación de vehículos a motor sen elementos silenciadores, con silenciadores non eficaces ou deteriorados, ou con tubos resoadores.

## **ARTIGO 13**

Queda prohibido o uso de bucinas ou calquera outro sinal acústico dentro do casco urbano, agás nos casos de néboa, inminente perigo de atropelo ou colisión, ou que se trate de servicios públicos de urxencia, como policía, servicio contra incendios e asistencia sanitaria ou de servicios privados para o auxilio urxente das persoas.

## **ARTIGO 14**

Os límites máximos admisibles para os ruídos polos distintos vehículos a motor en circulación serán os establecidos nas normas administrativas que os regulen.

## **ARTIGO 15**

Con carácter xeral prohíbese o emprego de todo dispositivo sonoro con fins de propaganda, reclamo, aviso, distracción e análogos, sempre que as súas condicións de funcionamento produzan niveis sonoros que excedan dos sinalados nesta Ordenanza para as distintas zonas. Esta prohibición non rexerá nos casos de alarma, urxencia ou tradicional consenso da poboación e poderá ser dispensada na totalidade por razóns de interese xeral ou de especial significación cidadá.

## **ARTIGO 16**

A carga e descarga, así coma o transporte de materiais en camións, deberá realizarse de maneira que o ruído producido non supoña incremento importante no nivel ambiental da zona.

O persoal de vehículos de reparto deberá cargar e descargar as mercadorías sen producir impactos directos sobre o chan do vehículo ou do pavimento e beirarrúa, e evitará o ruído producido polo desprazamento ou trepidación da carga durante o percorrido.

Queda excluída desta prescrición a recollida municipal de residuos urbanos, así coma as actuacións de recoñecida urxencia.

### **ARTIGO 17**

Os receptores de radio, televisión e en xeral todos os aparellos reprodutores de son, illaranse e regularanse de maneira que o ruído transmitido ás vivendas ou locais lindantes non exceda do nivel máximo autorizado. Tamén se considera como transgresión desta Ordenanza o comportamento incívico dos veciños, cando transmitan ruídos que superen os niveles establecidos.

## **TÍTULO II.**

### **PERTURBACIÓNS POR VIBRACIÓNS**

### **ARTIGO 18**

Non se poderán transmitir vibracións con valores superiores ós seguintes:

- Na zona de máxima proximidade ó elemento xerador de vibracións, 30 PALS.
- No límite do recinto onde se encontre emprazado o xerador de vibracións, 17 PALS.
- Fóra daqueles locais e na vía pública, 5 PALS.

### **ARTIGO 19**

Para corrixir a transmisión de vibracións, deberán terse en conta as seguintes regras:

1. Todo elemento con órganos móbiles manterase en perfecto estado de conservación, principalmente no que se refire ó seu equilibrio dinámico ou estático, así como a suavidade en marcha das chumaceiras ou camiños de rodaxe.
2. Non se permitirá a ancoraxe aberta de máquinas ou soportes destas ou de calquera órgano móbil en paredes medianeiras, en teitos ou en forxados de separación entre locais de calquera clase ou actividade, ou en elementos constructivos de edificación.
3. A ancoraxe de toda máquina ou órgano móbil en solos ou

en estruturas non medianeiras, ou en estruturas non directamente conectadas cos elementos constructivos da edificación, dispoñeráse, en todo caso, interpoñendo dispositivos antivibratorios adecuados.

4. As máquinas de arranque violento, as que traballen por golpes ou choques bruscos, e as dotadas de órganos con movemento alternativo, deberán estar ancoradas en bancadas independentes, sobre o chan firme, e illadas da estrutura da edificación e do chan do local por medio de materiais absorbentes da vibración.
5. Situaranse todas as máquinas de forma que as súas partes máis saíntes, ó final da carreira de desprazamento, queden a unha distancia mínima de 0,70 m. dos muros perimetrais e forxados, debendo elevarse a 1 m. de distancia cando se trate de elementos medianeiros.
6.
  - a. Os conductos polos que circulen fluídos, líquidos ou gasosos, en forma forzada, conectados directamente con máquinas que teñan órganos en movemento, dispoñerán de dispositivos de separación que impidan a transmisión de vibracións xeradas en tales máquinas. As bridas e soportes dos conductos terán elementos antivibratorios. As aberturas dos cursos para o paso das conductiones encheranse con materiais absorbentes da vibración.
  - b. Calquera outro tipo de conduction susceptible de transmitir vibracións, independentemente de estar unida ou non a órganos móbiles, deberá cumprir co especificado no parágrafo anterior.
7. Nos circuítos de auga coidarase de que non se presente o "golpe de ariete" e as seccións e disposicións das válvulas e das billas haberán de ser tales que o fluído circule por elas en réxime laminar.

### **TÍTULO III - RÉXIME DISCIPLINARIO**

#### **ARTIGO 20**

1. Consideraranse como infraccións administrativas os actos e emisións contidos nesta ordenanza, respecto ós focos emisores.
2. As infraccións clasifícanse en leves, graves e moi graves, de conformidade co establecido nos artigos

seguintes.

3. Os actos administrativos sancionadores que se establecen nos artigos anteriores serán recorribles na forma e prazo previsto na *Lei de réxime xurídico e procedemento administrativo común*.

## **ARTIGO 21**

1. En materia de ruídos considerárase:

- **Infracción leve:** superar en 3 DBA ós niveis máximos admisibles.
- **Infraccións graves:**
  - a. A reincidencia en faltas leves.
  - b. Superar entre 3 e 5 DBA os ruídos máximos admisibles por esta Ordenanza.
- Consideráranse **infraccións moi graves:**
  - a. A reincidencia en faltas graves.
  - b. A emisión de niveis sonoros que superen en 6 ou máis DBA os límites máximos autorizados.

2. En materia de vibracións, consideráranse:

- **Infraccións leves:** superar os niveis de transmisión correspondentes á curva K inmediatamente superiores á máxima admisible para cada situación.
- **Infraccións graves:**
  - a. A reincidencia en faltas leves.
  - b. Obter niveis de transmisión correspondentes a 2 curvas K inmediatamente superiores á máxima admisible para cada situación.
- **Infraccións moi graves:**
  - a. A reincidencia en faltas graves.
  - b. Obter niveis de transmisión correspondentes a máis de 2 curvas K inmediatamente superiores á máxima admisible para cada situación.

## **ARTIGO 22**

Sen prexuízo de esixir as correspondentes responsabilidades civís e penais, nos casos en que proceda, as infraccións ós preceptos da presente Ordenanza relativas á contaminación atmosférica polo ruído como

forma de enerxía, han sancionarse da seguinte maneira:

1. **Infraccións leves** con multas de **5.000**.
2. **Infraccións graves** con multas de **10.000**.
3. **Infraccións moi graves** con multas de **25.000**.

### **ARTIGO 23**

Sen prexuízo das sancións que sexan pertinentes, será causa de precintado inmediato da instalación, previo requirimento de amaño dos ruídos, o superar en máis de 10 dBA os límites de niveis sonoros para o período nocturno, e de 15 dBA para o diúrno.

### **ARTIGO 24**

O dito precintado poderá ser levantado para efectuar as operacións de reparación e de posta a punto. Sen embargo, a instalación non poderá poñerse en marcha ata que o persoal de inspección do servizo municipal competente autorice o seu funcionamento despois das probas pertinentes.

### **ARTIGO 25**

Para o caso de actividades reguladas polo RAMINP, o alcalde ou a Comisión de Goberno poderán elevar ós órganos competentes proposta de multa superior. Sen prexuízo das sancións correspondentes, tamén poderán dispoñer a retirada temporal ou definitiva da licencia e o cesamento da actividade mentres subsistan as causas do efecto perturbador.

## **LIBRO II:**

### **PROTECCIÓN DOS ESPACIOS PÚBLICOS EN RELACIÓN COA SÚA LIMPEZA E RETIRADA DE RESIDUOS**

#### **TÍTULO I.**

##### **DISPOSICIÓN XERAIS**

###### **ARTIGO 26**

Este libro ten por obxecto a regulación das actividades dirixidas á limpeza dos espazos públicos e recollida de lixos para conseguir as adecuadas condicións de pulcritude e ornato urbano.

###### **ARTIGO 27**

Para os efectos de incardinación normativa, a regulación atense ós principios da *Lei 42/75, do 19 de novembro, sobre recollida e tratamento dos lixos e residuos sólidos urbanos, e demais disposicións aplicables.*

###### **ARTIGO 28**

Considéranse lixos e residuos sólidos, conforme ó establecido no artigo 2 da lei citada no artigo anterior, os producidos por actividades e situacións domiciliarias, comerciais e de servizos, sanitarias, de limpeza urbana, industriais, obras en edificios, abandono de animais mortos, de mobles, de trastes e de vehículos e, en xeral, todos aqueles que corresponda ó Concello a súa recollida, transporte, almacenamento ou eliminación de acordo coa lexislación vixente.

#### **TÍTULO II.**

##### **LIMPEZA DA REDE VIARIA E OUTROS SERVIZOS**

###### **ARTIGO 29**

A limpeza da rede viaria pública e a recollida dos residuos procedentes da mesma será realizada polo servizo municipal competente coa frecuencia conveniente para a

adecuada prestación do servizo e a través das formas de xestión que acorde o Concello, conforme á lexislación de réxime local.

### **ARTIGO 30**

1. A limpeza das rúas de dominio particular deberá levarse a cabo polo propietario, seguindo as directrices que dicte o Concello para conseguir uns niveis adecuados.
2. Tamén estarán obrigadas as comunidades de propietarios ou quen habitase o inmovible ou inmoibles lindantes no seu caso, a manter limpos os patios de luces, os patios de bloques de casas ou calqueroutra zona común, conforme ás súas normas estatutarias ou acordos tomados para o efecto polas respectivas xuntas.

### **ARTIGO 31**

1. A limpeza de solares e outros terreos de propiedade particular que se encontren en solo urbano e non estean incluídos no artigo anterior corresponderá igualmente á propiedade.
2. O incumprimento da obriga de manter limpos os ditos terreos non exime da obriga de proceder ó seu valado nos termos previstos na presente Ordenanza.

### **ARTIGO 32**

1. Prohíbese botar ou verter na vía pública todo tipo de residuos, como cabichas, cascas, papeis ou calqueroutro desperdicio similar. Quen transitase polas rúas, prazas, xardíns ou outros espazos libres públicos, e quixera desprenderse de residuos de pequena entidade, coma os anteriormente mencionados, utilizarán as papeleiras instaladas para tal fin.
2. Os usuarios deberán absterse de toda manipulación sobre as papeleiras, de movelas, vertelas ou arrincalas, así como calqueroutro acto que deteriore a súa presentación ou as faga inutilizables para o uso a que están destinadas.

### **ARTIGO 33**

1. Queda prohibido realizar calquera operación que poda ensuciar as vías e espazos libres públicos, e de xeito

especial:

- a) Lavar ou limpar vehículos, así como cambiarlles o aceite e outros líquidos.
- b) Manipular ou seleccionar o lixo ou residuos sólidos urbanos producindo a súa dispersión, dificultando a súa recollida, ou alterando os seus envases.
- c) Sacudir prendas ou alfombras na vía pública, ou sobre ela, dende ventás, balcóns ou terrazas.

#### **ARTIGO 34**

1. Non se permite realizar actos de propaganda, ou calqueroutra clase, que supoñan lanzar carteis, folletos ou follas soltas, cando tales actos ensucien os espacios públicos.
2. Terá a consideración de acto independente, para os efectos de sanción, cada actuación separada no tempo ou no espacio contraria ó establecido no número anterior. Serán responsables da infracción aquelas persoas físicas ou xurídicas que promovan ou xestionen a publicidade e, no seu defecto e agás proba en contrario, aqueloutras polas que se faga esta.
3. Quedará dispensada a propaganda electoral durante os períodos legalmente habilitados, e aqueloutros de especial significación política e xeral participación cidadá nos que sexa pertinente a realización de actos publicitarios, de acordo coas disposicións municipais que se adopten para tales efectos.

#### **ARTIGO 35**

1. Quen estea á fronte de quioscos ou postos autorizados na vía pública, ben sexa en sitios illados ou en mercadiños, están na obriga de manter limpo o espacio no que desenvolvan o seu cometido e as súas proximidades, durante o horario no que realicen a súa actividade, e deixalo no mesmo estado axiña que esta remate.
2. A mesma obriga incumbe ós donos de cafés, bares e establecementos análogos en canto á superficie de vía ou espacio libre público que se ocupe con veladores, cadeiras, etc, así como á beirarrúa correspondente á lonxitude da súa fachada.
3. Os titulares dos establecementos, quioscos ou postos,

así coma os concesionarios de despachos de tabacos e lotería nacional, deberán instalar pola súa conta e cargo as papeleiras necesarias. A recollida dos residuos acumulados nelas efectuarase polo servizo municipal competente.

### **ARTIGO 36**

1. Rematada a carga e descarga de calquera vehículo con observancia das normas que para tales actividades se establezan, procederase a limpar a beirarrúa e calzadas que se lixasen durante a operación, retirando da vía pública os residuos vertidos.
2. Están obrigados ó cumprimento deste precepto os donos dos vehículos e, subsidiariamente, os titulares dos establecementos ou leiras nas que se efectuase a carga ou descarga.

### **ARTIGO 37**

1. O persoal de establecementos ou industrias que utilicen para o seu servizo vehículos de tracción mecánica e que adoiten estacionalos na vía pública, deberán limpar debidamente, e coa frecuencia precisa, o espazo ocupado por estes.
2. Este precepto tamén se aplica ós espazos reservados para o estacionamento de camións ou autocares de aluguer, sendo responsables da infracción os seus propietarios.

### **ARTIGO 38**

Os propietarios e conductores de vehículos que transportasen terras, cascallos, materiais pulverulentos, áridos, formigón, cartóns, papeis ou calquer outra materia similar, deberán tomar todas aquelas medidas que cumpran para cubrir tales materiais durante o seu transporte, e evitar que a causa da súa natureza ou por efecto da velocidade do vehículo ou do vento, caian sobre a vía pública auga, po, ou parte dos materiais transportados.

Así mesmo, e antes de saír das obras, deberán lavarse os baixos e rodas dos vehículos coa fin de impedir que se ensucien as vías públicas.

### **ARTIGO 39**

Cando se realicen pequenas obras na vía pública por mor de canalizacións, tapado de calas, etc, e sen prexuízo do estricto cumprimento das previsións contidas nas normas de aplicación, os sobrantes e cascallos haberán ser retirados dentro das 24 h seguintes ó remate dos traballos, deixándoos mentres debidamente amoreados, de xeito que non se perturbe a circulación de viandantes e vehículos.

### **TÍTULO III.**

#### **LIMPEZA DE EDIFICACIÓNS**

##### **ARTIGO 40**

1. Os propietarios das leiras, vivendas e establecementos, están obrigados a manter en constante estado de limpeza as diferentes partes dos inmobles que sexan visibles dende a vía pública, de tal xeito que se consiga unha uniformidade na súa estética, acorde co seu contorno.
2. Os propietarios de edificios dispoñerán o preciso para levar a cabo o reboco e pintado de fachadas incluíndo a parte dos portais que resulte visible dende o exterior.
3. As casas que carezan de reboco exterior e as de recente construción, deberán ser necesariamente enfoscadas, lucidas e pintadas en todas as súas fachadas incluíndo a parte dos portais que resulte visible dende o exterior.
4. Os baixantes e canos repararanse e acondicionarán de xeito que non ofrezan ningún desperfecto nin causen molestias ós viandantes.
5. A mesma obriga de reboco, caleo e pintado abarca ós propietarios de establecementos comerciais e industriais, polo que respecta á fachada, escaparates e rótulos.

##### **ARTIGO 41**

1. Cando se realice limpeza de escaparates, portas, marquesiñas, toldos ou cortinas dos establecementos comerciais, adoptaranse as debidas precaucións para non causar molestias ós viandantes nin ensuciar a vía pública. De ser esta ensuciada, os donos do establecemento están obrigados á súa limpeza, retirando os residuos resultantes.

2. Iguais precaucións haberán adoptarse para a limpeza de balcóns e terrazas, así como para a rega das plantas instaladas deles.

#### **ARTIGO 42**

1. Co obxecto de manter as condicións de limpeza e pulcritude que esixen o ornato e a estética da vila, queda prohibido:
  - a. Colocar carteis e realizar inscricións ou pintadas en paredes, muros, quioscos, cabinas, fachadas, farois, enreixados, valos, papeleiras etc.
  - b. Rachar, ensuciar ou arrancar aqueles carteis ou anuncios situados nos lugares ou emprazamentos autorizados para tal efecto.
2. Considéranse separadamente como actos sancionables as actuacións contrarias ó disposto no punto anterior, en relación cos anuncios ou carteis de calquera contido que se fixasen en cada inmovible ou nos demais lugares prohibidos.
3. Para os efectos de responsabilidade será de aplicación o establecido no artigo 34.2 desta Ordenanza.

#### **ARTIGO 43**

1. Os propietarios ou titulares de inmoables, monumentos, quioscos, etc, quedan obrigados a manter limpas as paredes e fachadas de calquera tipo de anuncio que non sexa o específico dunha profesión ou actividade mercantil.
2. Unicamente se permitirá a colocación de carteis ou anuncios nos sitios destinados para este obxecto, sempre que, ademais, estean amparados pola preceptiva licencia e que se cumpra coas normas específicas aplicables.

#### **ARTIGO 44**

Durante os períodos electorais, e aqueloutros de xeral participación cidadá nos que sexa pertinente a realización de actos de propaganda e publicidade, o Concello de Vilalba adoptará, de conformidade co que se dispoña na respectiva normativa, espazos especialmente reservados

para a súa utilización como soportes publicitarios.  
especialmente reservados para a súa utilización como  
soportes publicitarios

#### **ARTIGO 45**

- a. Os propietarios ou posuidores de solares que dean fronte á vía pública, están obrigados a cerralos. Os peches terán unha altura de 2 m e serán construídos a base de lastros ou cachote granítico podendo empregarse ladrillo ou bloque de cemento rebocado. Queda terminantemente prohibido depositar neles desperdicios ou lixos, debendo branquearse os cerres.
- b. Os valos que cerren os solares que se atopen en construción deberán conservarse pintados e en estado decoroso.
- c. Toda obra de construción deberá estar rodeada dun valo. Os servizos técnicos municipais determinarán, no momento de outorgamento da licenza, a superficie de dominio público máxima a ocupar, debendo permitir en todo caso o tránsito de viandantes en adecuadas condicións de seguridade.
- d. O cumprimento das obrigas derivadas deste artigo estarán exentas de taxa municipal.
- e. O incumprimento das obrigas recollidas neste artigo, así como no artigo 40, dará lugar á imposición das seguintes:

#### **SANCIÓNS:**

- a. Establécese unha sanción de 9,02 € por metro lineal no primeiro requirimento e de 18,03 € no segundo para o suposto de incumprimento da obrigación de peche de solares, que se recolle nesta Ordenanza.
- b. Para o valado de obras fíxase unha sanción de 3,01 € e 6,01€ o metro lineal respectivamente para o primeiro e o segundo requirimento.
- c. En canto ó incumprimento dos deberes de limpeza, revoco e pintado, recollidas no artigo 40, establécese unha sanción de 3,01 e de 6,01 € respectivamente no primeiro e segundo requirimento.
- d. Facúltase ó sr. alcalde para fixar os prazos en que se cumprirán as obrigas, entendéndose que o prazo para sancionar comeza a partir do requirimento formulado

pola alcaldía.

#### **TÍTULO IV.**

### **RETIRADA DE RESIDUOS SÓLIDOS URBANOS E PROTECCIÓN DOS ESPACIOS PÚBLICOS EN RELACIÓN COA SÚA LIMPEZA.**

#### **ARTIGO 46**

Enténdese por residuos sólidos urbanos os xerados por calquera actividade nos núcleos de poboación ou nas súas zonas de influencia. En base á *Lei 42/75*, do 19 de novembro, considéranse RSU os producidos por actividades e situacións domiciliarias, comerciais e de servizos, limpeza viaria, zonas verdes e recreativas, abandonos de animais mortos, mobles, trastes, mercadorías e vehículos industriais e da construción, así como agrícolas e gandeiros, que se produzan nas zonas clasificadas de acordo coa normativa urbanística como urbanas e urbanizables.

#### **ARTIGO 47**

1. Queda terminantemente prohibido o vertido de todo tipo de residuos sólidos reseñados no artigo anterior.
2. A recollida de residuos sólidos será establecida polo servizo municipal competente, coa frecuencia e horarios que se considere oportunos, dando a publicidade necesaria para coñecemento dos veciños.

#### **ARTIGO 48**

Enténdese por residuos domiciliarios os que proceden da normal actividade doméstica, así coma os producidos por establecementos comerciais que pola súa natureza e volume son asimilables ós anteriores.

#### **ARTIGO 49**

O Concello poderá dispoñer que en toda a vila, ou en sectores ou zonas determinadas, se presenten por separado, ou se depositen en recipientes especiais, aqueles residuos susceptibles de distinto aproveitamento, como papeis, botellas, latas, etc.

### **ARTIGO 50**

A presentación dos residuos domiciliarios farase obrigatoriamente en bolsas de papel ou plástico que sexan resistentes á rotura, e perfectamente pechadas e depositadas nos recipientes normalizados que en cada caso sinale o Concello de acordo coa natureza dos residuos, coas características do sector ou vía pública e co planeamento realizado para a recollida e transporte polo servicio correspondente.

Deberán dobrarse ou racharse as caixas de cartón ou madeira, de xeito que permitan o máximo aproveitamento do colector. Utilizaranse os colectores asignados, pechando logo a tapa, estando prohibido o depósito de lixo ó redor deles.

### **ARTIGO 51**

Nas zonas, sectores ou barrios onde a recollida se efectúe mediante recipientes herméticos subministrados polo Concello, os usuarios de tales recipientes, teñen a obriga de conservarlos e mantelos en adecuadas condicións de hixiene, coa dilixencia que o *Código Civil* esixe ó usufructuario de bens alleos, sendo responsables do deterioro que os recipientes poidan sufrir pola súa culpa ou negligencia.

### **ARTIGO 52**

1. Cando os recipientes que conteñan os residuos sexan colocados na vía pública, na beirarrúa, ó pé do bordo da calzada, ou no lugar que se sinale, esta operación non poderá facerse antes das 20 h no casco urbano.
2. Se polo planeamento na frecuencia do servicio os domingos e festivos non houberse recollida, durante estes días non se poderán depositar residuos nos colectores situados na vía pública.

### **ARTIGO 53**

1. Nos centros públicos ou privados, vivendas, supermercados, centros sanitarios, etc. a retirada dos residuos correrá a cargo do servicio municipal competente, pero non o seu varrido ou limpeza. Estas operacións deben realizarse coa frecuencia necesaria para manter os locais nas debidas condicións de salubridade e hixiene.

2. Se unha entidade pública ou privada tivese por calquera causa que desprenderse de residuos sólidos en cantidades maiores ás que constitúen a produción diaria normal, non poderán presentalos conxuntamente cos residuos habituais. Nestes casos a entidade poderá ser autorizada ó transporte dos residuos cos seus propios medios ós puntos de transformación ou eliminación que indique o servicio municipal competente, ou ben poderán solicitar a súa retirada ó mencionado servicio.

En ambos casos ou Concello pasará o correspondente cargo pola eliminación ou transformación dos residuos e ademais no segundo caso o aumentado co correspondente cargo de transporte.

#### **ARTIGO 54**

Considéranse residuos industriais especiais os xerados polas empresas dentro de súa actividade e que queden fóra dos considerados inertes ou asimilables ós residuos urbanos, e, en xeral, os que representen risco para a saúde pública e o medio ambiente.

#### **ARTIGO 55**

Os produtores ou posuidores de residuos industriais especiais están obrigados á xestión das medidas necesarias para asegurar que o transporte, tratamento, eliminación, ou, no seu caso, o seu aproveitamento, se realice sen riscos para a saúde pública ou para o medio ambiente.

#### **ARTIGO 56**

1. Prohíbese depositar na vía pública ou en lugares non permitidos calquera tipo de cascallo ou refugallo, procedente de calquera clase de obra de construción e remodelación de edificios ou de obras realizadas no seu interior, sexan realizadas na totalidade ou nalgunha das vivendas.
2. Igualmente queda prohibido almacenar na vía pública, fóra dos lindes do valado protector das obras, materiais de construción: ladrillo, cemento, etc.
3. Prohíbese depositar na vía pública e en lugares non permitidos calquera tipo de mercancía ou material

procedente tanto de actividades industriais ou comerciais, coma de particulares.

#### **ARTIGO 57**

1. Queda prohibido depositar nos espazos públicos mobles, trastes e obxectos inútiles para que sexan retirados polos camións colectores da recollida domiciliaria.
2. As persoas que desexen desprenderse de tales elementos solicitarano do servizo municipal competente.

#### **ARTIGO 58**

Sen prexuízo das causas de retirada e depósito de vehículos previstos na *Lei de tráfico, circulación de vehículos a motor e seguridade vial*, os servizos municipais, procederán á retirada dos vehículos situados na vía pública, ou terreos adxacentes e espazos libres públicos, sempre que polos signos exteriores, polo tempo de permanencia na mesma situación, ou por outras circunstancias, poidan considerarse residuos sólidos urbanos como consecuencia da súa situación de abandono.

#### **ARTIGO 59**

Para os efectos desta Ordenanza e no seu ámbito de aplicación, considéranse abandonados aqueles vehículos, ou os seus restos, que polos seus signos exteriores non sexan aptos para circular por careceren dalgún dos elementos necesarios, ou que, aínda contando aparentemente coa totalidade destes elementos, tanto os seus evidentes sinais de deterioro, coma o tempo de permanencia en idéntica posición de estacionamento, permitan presumir a mesma situación de abandono. Neste caso notificaráselle ó propietario, de acordo coa lexislación aplicable.

#### **ARTIGO 60**

Exclúense da consideración de abandonados aqueles vehículos sobre os que recaía orde ou mandamento xudicial, coñecido polo Concello, para que permanezan na mesma situación, aínda que a autoridade municipal poderá recadar a adopción das medidas pertinentes en orde ó ornato urbano.

## **ARTIGO 61**

1. e Unha vez efectuada a retirada e depósito dun vehículo abandonado conforme ós termos definidos nos artigos anteriores, o Concello notificará a quen figure como titular no padrón de vehículos ou a quen resultase ser o seu lexítimo propietario na forma establecida para as notificacións na *Lei 30/92 de réxime xurídico das administracións públicas e procedemento administrativo común*.
2. Na mesma notificación requirirase ó titular do vehículo para que manifieste se, de acordo co artigo 3.2 da *Lei 42/75 de recollida e tratamento dos lixos e residuos sólidos urbanos*, deixa o vehículo ou os seus restos a disposición do Concello, que adquirirá a súa propiedade, ou pola contra opta por facerse cargo deles para a súa eliminación conforme ás prescricións da dita Lei, apercibíndoo de que en caso de silencio durante o prazo indicado, ha entenderse que opta pola primeira das posibilidades.
3. Se o propietario do vehículo ou dos seus restos fose descoñecido, a notificación indicada efectuarase conforme ás normas xerais.

## **ARTIGO 62**

En todo caso os propietarios dos vehículos ou dos seus restos deberán soportar os gastos de recollida, transporte e depósito. O seu pagamento será previo nos supostos en que opten por facerse cargo daqueles, conforme ó que se establece no número 2 do artigo anterior.

## **ARTIGO 63**

Calquera persoa poderá comunicarllo ó Concello, ou ós axentes da autoridade, por escrito ou verbalmente, a existencia dun vehículo ou dos seus restos presumiblemente abandonados, sen que por tal actuación adquiran ningún dereito sobre aqueles ou sobre o seu valor.

## **ARTIGO 64**

1. Prohíbese o abandono de cadáveres de animais de toda especie sobre calquera clase de terreos, e tamén a súa inhumación en terreos de propiedade pública.
2. A sanción por incumprimento desta norma será

independente das responsabilidades que estean previstas na normativa de orde sanitaria.

#### **ARTIGO 65**

1. As persoas que precisen desprenderse de animais mortos farano a través dos servicios municipais competentes, que procederán á súa recollida, transporte e eliminación.
2. Este servizo municipal será gratuíto cando se trate de animais domésticos en réxime de convivencia ou de cativeiro, de referirse a un só exemplar e cando a prestación do servizo se solicite de maneira illada e esporádica por veciños de Vilalba.
3. O que se dispón no parágrafo anterior, non será aplicable no caso de explotacións gandeiras e industriais.

#### **ARTIGO 66**

A eliminación de animais mortos non exime ós propietarios en ningún caso da obriga de comunicar a baixa do animal e as causas da súa morte, cando así veña establecido nas disposicións legais vixentes.

#### **ARTIGO 67**

Quen observase a presenza dun animal morto pode comunicar tal circunstancia ó servizo municipal competente coa fin de proceder á retirada do cadáver nas condicións hixiénicas necesarias para tal operación.

#### **ARTIGO 68**

1. Inclúese neste epígrafe calquer outro residuo non sinalado especificamente entre os especiais, ou aqueles que, procedendo de actividades comerciais, esixan unha recollida, transporte ou tratamento selectivo, por razón das condicións anormais en que estes puidesen encontrarse.
2. Tamén se consideran residuos os restos vexetais de podas, procedentes de leiras urbanas particulares ou de comunidades de veciños. A recollida destes faraa o servizo correspondente e queda terminantemente prohibido botalos en terreos públicos ou privados.

3. A presentación dos residuos vexetais, para a súa recollida, farase en bolsas normalizadas e cerradas. Cando o particular ou as comunidades teñan concluídas as podas, e os restos estean metidos en bolsas, comunicarán ben telefonicamente ou ben por escrito ó servicio correspondente a dispoñibilidade para a retirada de residuos.
4. Entre a recollida da poda e o transporte, as bolsas manteranse dentro da propiedade e queda prohibido o depositalas na vía pública.

#### **ARTIGO 69**

1. Os depósitos ou vertedoiros para a eliminación de residuos sólidos urbanos son de exclusiva competencia municipal, e en canto á súa situación, instalación, forma de vertido e funcionamento, deberán cumprirse coas disposicións vixentes nesta materia.
2. Todo vertedoiro que non cumpra co establecido no punto anterior será considerado clandestino e inmediatamente clausurado, sen prexuízo das sancións previstas e das responsabilidades a que dese lugar.

## **TITULO V- RÉXIME DISCIPLINARIO**

### **ARTIGO 70**

Toda persoa natural ou xurídica poderá denunciar ante o Concello as infraccións da presente Ordenanza en relación coa materia a que se refire este libro.

### **ARTIGO 71**

As responsabilidades derivadas do incumprimento das obrigas que se sinalan neste libro serán esixibles, non só polos actos propios, senón tamén polos daquelas persoas de quen se deba responder e polo proceder dos animais, ós respectivos propietarios.

### **ARTIGO 72**

1. Consideraranse infraccións administrativas, en relación coas materias a que se refire este libro, os actos ou omisións que contraveñan o que se establece nas normas que integran o seu contido.
2. As infraccións clasifícanse en leves, graves e moi graves, segundo se establecen nos artigos seguintes:

### **ARTIGO 73**

1. Consideraranse ***infraccións leves***:
  - a. A falta de limpeza das rúas particulares e en espazos libres do mesmo carácter.
  - b. Botar desperdicios na vía pública, así como realizar as operacións prohibidas no artigo 33, agás cambiar o aceite e outros líquidos ós vehículos.
  - c. Non instalar as papeleiras esixidas ou a falta de limpeza na vía pública, nos supostos dos artigos 35 e 36.
  - d. Deixar na vía pública residuos procedentes da limpeza de escaparates, portas ou toldos de establecementos comerciais.
  - e. Rachar, emporcar ou arrincar carteis ou anuncios colocados nos lugares ou emprazamentos autorizados.
  - f. O incumprimento das obrigas recollidas no artigo 49.
2. Consideraranse ***infraccións graves***:

- a. A reincidencia de *infraccións leves*.
- b. Cambiar o aceite e outros líquidos ós vehículos na vía pública e espazos libres públicos.
- c. Realizar actos de propaganda mediante lanzamento de carteis, folletos, follas soltas etc, que emporquen os espazos públicos.
- d. Omitir as operacións de limpeza despois da carga ou descarga de vehículos ou incumprir as obrigas do artigo 37.
- e. Non retirar no prazo establecido os cascallos procedentes de obras na vía pública, así como almacenar nela cascallos e materiais de construción.
- f. O depósito na vía pública e en lugares non permitidos de calquera tipo de mercancía ou material procedente tanto de actividades comerciais ou industriais, coma de particulares.
- g. Colocar carteis en lugares non permitidos e realizar inscricións ou pintadas.
- h. Usar indebidamente ou danar os recipientes herméticos subministrados polo Concello.
- i. Abandonar mobles ou trastes na vía ou en espazos públicos.
- j. Abandonar cadáveres de animais ou inhumalos en terreos de dominio público.
- k. O incumprimento das obrigas recollidas no artigo 40.4.
- l. O incumprimento das obrigas recollidas no artigo 68.

### **3. Consideraranse *infraccións moi graves*:**

- a. Reincidencia en faltas graves.
- b. Dedicarse á recollida, transporte ou aproveitamento de residuos sen a debida autorización, ou entregalos a quen teña tal dedicación.
- c. Carecer de libro rexistro de residuos industriais así coma o vertido incontrolado destes.
- d. Non entregar ó Concello os restos a que se refire este libro.
- e. Non proporcionar información ó Concello sobre a orixe, cantidade e características dos residuos que poidan producir trastornos no transporte ou tratamento, así como proporcionar datos falsos ou impedir e obstruír o labor inspector nos supostos de residuos industriais.

## **ARTIGO 74**

Sen prexuízo de esixir, cando proceda, as responsabilidades de carácter penal ou civil correspondentes, as *infraccións* ós preceptos do presente libro, en materia de limpeza urbana e residuos sólidos,

serán sancionadas na forma seguinte:

- a. **Infraccións leves:** Multa de ata **60,10**.
- b. **Infraccións graves:** Multa de **60,11 a 90,15**.
- c. **Infraccións moi graves:** Multa de **90,16 a 150,25**.
- d. Ademais imputarase ó causante do vertido os gastos orixinados pola recollida.
- e. Órgano competente poderá impoñer as sancións que se prevén na *Lei 42/75*, do 19 de novembro, *sobre restos e residuos sólidos urbanos* e demais lexislación que a desenvolva, podendo chegar a contía ata 3005,06 € segundo disposición do Pleno Municipal.

#### **ARTIGO 75**

1. Para determinar a contía da sanción atenderase ás circunstancias concorrentes nos feitos que a motivaron, tales coma natureza da infracción, grao de intencionalidade e reincidencia, así como aquel outros factores que poidan considerarse como atenuantes ou agravantes.
2. Será considerado reincidente quen incorrese na infracción das mesmas materias nos 12 meses anteriores.

## **LIBRO III**

### **TENENCIA DE CANS E OUTROS ANIMAIS DOMÉSTICOS**

#### **TÍTULO I**

##### **DISPOSICIÓN XERAIS**

###### **ARTIGO 76**

A normativa contida no presente Libro ten por obxecto regular todos os aspectos relativos á tenencia de cans e outros animais domésticos no termo municipal de Vilalba, que afecte á tranquilidade, seguridade e salubridade cidadás.

Naquelas materias non contempladas por este Regulamento ou que regule a autoridade municipal de conformidade con el, aplicaranse as normas de carácter xeral sobre medidas hixiénico-sanitarias aplicables a cans e gatos.

###### **ARTIGO 77**

A competencia do Concello nas materias que son obxecto de regulación por este libro, exerceranse a través dos órganos e servicios da Administración municipal existentes na actualidade ou que no seu caso poidan crearse para tal efecto.

###### **ARTIGO 78**

Sen prexuízo das facultades atribuídas pola normativa de carácter xeral a outras Administracións públicas, as infraccións ó que se dispón no presente libro serán sancionadas pola alcaldía, segundo o cadro de multas anexo a este libro, tendo en conta para a súa graduación as circunstancias de perigo para a saúde pública, falta de colaboración cidadá, o desprezo das normas elementais de convivencia, e outras que puidesen concorrer nos feitos, sen prexuízo da actuación da xurisdicción competente.

#### **TÍTULO II**

##### **CANS**

#### **ARTIGO 79.**

Os propietarios ou posuidores de cans están obrigados a cumprir o que se dispón no presente Regulamento, sendo responsables subsidiarios os titulares das vivendas, establecementos ou locais onde radiquen estes.

#### **ARTIGO 80**

1. Nas vías públicas tódolos cans terán que ir provistos de bozo, agás naqueles casos que pola súa natureza e características sexa razoablemente previsible a súa non perigosidade, en aras dunha maior seguridade das persoas. Irán ademais conducidos por persoa capaz e idónea, suxeitos con cadea, correa ó cordón resistente e co correspondente colar, onde porten a medalla do control sanitario e a chapa numerada de matrícula.
2. A alcaldía poderá ordenar con carácter xeral o uso de bozo, cando as circunstancias sanitarias así o aconsellen.

#### **ARTIGO 81.**

1. Como medida hixiénica ineludible, as persoas que conduzan cans procurarán impedir que estes depositen as súas dexeccións nas vías públicas, xardíns, paseos, e, en xeral, en calquera lugar destinado ó tránsito de viandantes en lugares públicos.
2. No caso de que as dexeccións queden depositadas nas beirarrúas, ou en calquera zona para viandantes, a persoa que conduza o animal está obrigada á súa limpeza.
3. Do incumprimento serán responsables as persoas que conduzan os animais e subsidiariamente os propietarios destes.

#### **ARTIGO 82.**

Prohíbese expresamente a entrada e permanencia de cans en toda clase de locais e de vehículos destinados á fabricación, venda, almacenamento, transporte ou manipulación de alimentos, centros de saúde, farmacias e centros públicos.

**ARTIGO 83.**

1. Queda expresamente prohibida a entrada de cans en locais ou recintos de espectáculos públicos, deportivos e culturais.
2. Igualmente queda prohibida a circulación ou permanencia de cans en piscinas de utilización xeral e noutros lugares nos que se adoite baña-lo público.

**ARTIGO 84.**

Os cans que garden solares, obras, locais, establecementos, etc, deberán estar baixo a vixilancia dos seus amos ou persoas responsables coa fin de que non poidan causar danos a persoas ou cousas, nin perturbar a tranquilidade cidadá, en especial en horas nocturnas. En todo caso deberá advertirse en lugar visible, e de xeito adecuado, a existencia do can.

**ARTIGO 85.**

Os cans que sirvan de guía ós deficientes visuais, rexeranse polo que se dispón no presente Libro, sen prexuízo da aplicación da súa normativa específica.

**ARTIGO 86.**

Os cans vagabundos e os que, sen sereno, circulen dentro do casco urbano ou polo termo municipal desprovistos de colar coa chapa numerada de matrícula, serán recollidos polos servicios municipais e conducidos ó depósito establecido para tal efecto, onde permanecerán 3 días a disposición dos seus amos, quen no seu caso deberá acreditar a propiedade e aboar a sanción e gastos que procedan.

**ARTIGO 87.**

1. Os cans capturados na vía pública e que non fosen reclamados polos seus amos nos prazos fixados no artigo precedente, ou se estes non aboasen as cantidades que fosen esixibles por alimentación, vacinación, matrícula e outros conceptos, quedarán durante 10 días a disposición de quen o solicite e se comprometa a regularizar a situación sanitaria e fiscal do animal. Neste caso as persoas que adopten un can librándoo do

sacrificio, non deberán aboar ningunha cantidade por gasto de mantenza ou multas pendentes, sempre que se acredite que non se trata dos seus anteriores titulares.

2. De non concorrer as anteriores circunstancias, os cans poderán ser cedidos a centros e institucións de carácter científico que o soliciten para os seus traballos de investigación, coa autorización dos servicios municipais e despois do informe do veterinario no que se garante que non sufrirán malos tratos nin danos que poidan evitarse ou paliarse.
3. Os cans non retirados nin cedidos sacrificaranse nas instalacións municipais por procedementos eutanásicos, tales coma o uso de barbitúricos, ou outros sistemas análogos, sen que poda utilizarse en ningún caso velenos ou procedementos que ocasionen a morte con sufrimento.

#### **ARTIGO 88.**

Quen se vise acometido por un can poderá ferilo ou matalo, se doutro xeito non puidese defenderse dos seus ataques. Se o can agresor fose vagabundo ou de dono descoñecido, a Administración Municipal e a persoa agredida deberán colaborar cos servicios correspondentes para proceder á súa captura.

#### **ARTIGO 89.**

As persoas que fosen trabadas por un can deberán inmediatamente dar conta do feito ás autoridades sanitarias e ós servicios municipais coa fin de que poida ser sometido a tratamento se así o aconsellase o resultado da observación do animal.

Os propietarios ou posuidores dos cans mordedores están obrigados a facilitar os datos correspondentes do animal agresor, tanto á persoa agredida ou ós seus representantes legais, coma ás autoridades competentes que o soliciten.

#### **ARTIGO 90.**

1. Os cans que causasen lesións a unha persoa deberán ser sometidos a control veterinario oficial durante 14 días. A observación realizarase no depósito municipal. Nestas dependencias será internado o animal durante dito período.

2. A petición do propietario, e previo informe favorable do servicio veterinario, a observación do can agresor poderá realizarse no domicilio do dono, sempre que o animal estea debidamente documentado e controlado sanitariamente. En todo caso, os gastos ocasionados serán de conta do propietario do animal.
3. Nos casos de declaración de epizootias, os amos dos cans cumprirán coas disposicións preventivas sanitarias que se dicten polas autoridades competentes así coma coas prescripcións que ordene a Alcaldía.
4. Anualmente deberán ser vacunados os cans nas datas fixadas ó efecto, facéndose consta-lo cumprimento desta obriga na súa tarxeta de control sanitario. Os cans non vacunados deberán ser recollidos polos servicios municipais e os seus amos sancionados.

#### **ARTIGO 91.**

A autoridade municipal dispoñerá, despois do informe do servicio veterinario, o sacrificio sen ningunha indemnización dos cans que fosen diagnosticados de rabia.

As persoas que ocultasen casos de rabia en animais, ou deixasen ó animal que a padeza en liberdade, serán denunciados ante as autoridades gubernativas ou xudiciais correspondentes.

#### **ARTIGO 92.**

Os establecementos de tratamento, coidados ou aloxamento de cans, dispoñerán obrigatoriamente de salas de espera coa fin de que estes non permanezan na vía pública, escaleiras ou outras dependencias antes de entraren nos citados establecementos. Igualmente os locais terán as condicións hixiénico-sanitarias e de seguridade adecuadas para o mantemento dos animais aloxados ou tratados.

### **TITULO III**

#### **OUTROS ANIMAIS DOMÉSTICOS**

#### **ARTIGO 93.**

Prohíbese terminantemente deixar soltos en espacios

exteriores toda clase de animais daninos ou ferozes.

**ARTIGO 94.**

A estancia de animais domésticos en vivendas urbanas estará condicionada á utilidade ou nocividade destes, en relación coas persoas, ás circunstancias hixiénicas do seu aloxamento e á posible existencia de perigos ou incomodidades para os veciños en xeral.

**ARTIGO 95.**

A Autoridade municipal decidirá o que proceda en cada caso, segundo informe que emitan os inspectores do servicio veterinario como consecuencia das visitas domiciliarias que lles haberán ser facilitadas polos ocupantes da vivenda.

Cando se decida que non é tolerable a estancia nunha vivenda ou local, os amos destes deberán proceder ó seu desaloxo, e de non o faceren voluntariamente despois de ser requiridos para iso, farano os servicios municipais a cargo daqueles, sen prexuízo da esixencia da responsabilidade que procedese por desobediencia á Autoridade.

**ARTIGO 96.**

A tenencia de aves de curral, coellos, pombas e outros animais de cría, suxeitarase ás mesmas esixencias establecidas para previr posibles molestias ós veciños e focos de infección, así como á normativa de xeral aplicación.

**ARTIGO 97.**

Os animais trabados por outro ou sospeitosos de padeceren rabia deberán ser sometidos a observación e ó tratamento que resulte adecuado e, no seu caso, a sacrificio.

## TÍTULO IV

### PROTECCIÓN DOS ANIMAIS

#### **ARTIGO 98.**

Queda prohibido respecto ós animais a que se refire este Libro:

1. Causar a súa morte agás nos casos de enfermidade incurable ou de necesidade ineludible.
2. Abandonalos en vivendas pechadas ou desalugadas, na vía pública, solares, xardíns, etc.
3. Vender na rúa toda clase de animais vivos, agás en lugares habilitados para tal efecto.
4. Golpearlos con varas e obxectos duros, inflixirlles calquera dano ou cometer actos de crueldade contra eles.
5. Levalos atados a vehículos de motor en marcha.
6. Sitalos á intemperie sen a adecuada protección respecto das circunstancias climatolóxicas.
7. Organizar pelexas de animais.
8. Incitar ós animais a acometerse os uns ós outros ou a lanzarse contra persoas, ou vehículos de calquera clase.

#### **ARTIGO 99.**

1. Quen inxustificadamente inflixise danos graves ou cometese actos de crueldade e malos tratos contra animais de propiedade allea, domésticos ou salvaxes, mantidos en cativeiro, será sancionado segundo o disposto no presente libro, sen prexuízo da esixencia da responsabilidade que proceda polo dono.
2. Os axentes da autoridade e cantas persoas presenciaren feitos contrarios a este libro, teñen o deber de denunciar ós infractores.

#### **ARTIGO 100.**

Os amos de animais que sexan denunciados por causarlles

malos tratos ou por térenos en lugares que non reúnan as condicións impostas polas normas sanitarias ou de protección animal, poderán ser decomisados se o seu propietario ou persoa de quen dependan non adoptase as medidas oportunas para cesar en tal situación. Axiña que se decomisen, aplicarase o disposto no artigo 87.

## **ARTIGO 101**

### **CADRO DE MULTAS**

1. Non circular cos cans suxeitos con cadea, correa ou cordón e colar coa medalla de control sanitario: entre **6,01 e 12,02 €**.

2. Circular cos cans desprovistos de bozo cando a súa natureza perigosa e as súas características o fagan necesario, ou cuanto así o ordase a autoridade municipal: **30,05 €**.

3. Non impedir que os cans depositen as súas dexeccións en lugares destinados ó tránsito de viandantes: entre **6,01 e 15,03**.

4. Non proceder á limpeza de dexeccións do can a persoa que conduza ou animal: de **3,01 a 33,06 €**.

5. Permitir a entrada ou permanencia de cans en locais ou vehículos destinados á fabricación, venda ou almacenamento, transporte ou manipulación de alimentos: entre **18,03 e 60,10 €**.

6. Introducir ou manter cans en establecementos incumprindo as prescripcións a que se refire o artigo 83: entre **6,01 e 30,05**. Descoído na vixilancia de cans gardiáns que poidan ocasionar perigo de agresión ás persoas e danos nas cousas ou perturbación da tranquilidade cidadá: entre **6,01 e 90,15 €**.

7. Non advertir en lugar visible da existencia de cans: entre **12,02 e 90,15 €**.

8. Non facilitar o dono dun can, que trabase unha persoa, os datos que lle requira a persoa agredida ou as autoridades competentes: **90,15 €**.

9. Non cumprir coas prescripcións de carácter sanitario que determina o artigo 90.3 e 90.4: **90,15 €**.

10. Deixar soltos en espazos exteriores animais daniños ou feroces: entre **30,05 e 90,15 €**.

11. Non proporcionar ou facilitar a un animal o tratamento adecuado cando presuntamente padeza rabia: 90,15.

12. Abandonar animais mortos: de **30,05 a 90,15 €**, segundo o lugar e circunstancias de abandono.

13. Quebrantar as prohibicións establecidas no artigo 98:

- Apartados 1, 5 e 7: 90,15 €
- Apartados 2 e 4: 30,05 €.
- Apartados 3, 6 e 8: 6,01 €.

14. Inflixir danos graves ou cometer actos de crueldade ou malos tratos contra animais de propiedade allea: de 12,02 a 60,10 €.

**LIBRO IV**  
**PROTECCIÓN DE ZONAS VERDES**

**TÍTULO I**  
**DISPOSICIÓN XERAIS**

**ARTIGO 102.**

Este libro ten por obxecto a regulación da implantación, conservación, uso e goce das zonas verdes do termo municipal, así coma dos distintos elementos instalados nelas, procurando a súa preservación por seren ámbitos imprescindibles para o equilibrio do ambiente urbano.

**ARTIGO 103.**

- a. Consideráanse zonas verdes os espazos destinados á plantación de arborado e xardinería conforme ás determinacións das normas urbanísticas.
- b. En todo caso serán consideradas como zonas verdes as prazas e pequenos xardíns, as aliñacións de árbores en beirarrúas e paseos e as xardineiras e elementos de xardinería instalados nas vías públicas.

**ARTIGO 104.**

Todos os cidadáns teñen dereito ó uso e goce das zonas verdes públicas, de acordo co establecido nesta Ordenanza e demais disposicións aplicables.

**ARTIGO 105.**

Os lugares a que se refire a presente Ordenanza, pola súa cualificación de bens de dominio e uso público, non poderán ser obxecto de privatización do seu uso en actos organizados que pola súa finalidade, contido, características ou fundamento, presupoña unha utilización

de tales recintos con fins particulares, en detrimento da súa propia natureza e destino.

#### **ARTIGO 106.**

Cando por motivos de interese se autoricen nestes lugares actos públicos, deberán tomarse as medidas previsoras necesarias para que a maior afluencia de persoas a estes non cause detrimento nas plantas e mobiliario urbano. En todo caso, tales autorizacións deberán ser solicitadas con antelación suficiente para adoptar as medidas precautorias necesarias.

#### **ARTIGO 107.**

Os usuarios de zonas verdes e do mobiliario urbano instalado nestas, deberán cumprir as instrucións que sobre a súa utilización figuren nos indicadores, anuncios, rótulos e sinais existentes.

En calquera caso deberán atender as indicacións que formulen os axentes da Policía Municipal ou o persoal de parques e xardíns.

## **TITULO II**

### **PROTECCIÓN DO MEDIO, ELEMENTOS VEXETAIS E MOBILIARIO URBANO**

#### **ARTIGO 108.**

Con carácter xeral para a boa conservación e mantemento das diferentes especies vexetais das zonas verdes, non se permitirán os seguintes actos:

- a. Toda manipulación realizada sobre as árbores e as plantas.
- b. Camiñar por zonas axardinadas acoutadas.
- c. Pisar o céspede de carácter ornamental, introducirse neste e utilizalo para xogar, repousar ou deitarse sobre el.
- d. Cortar flores, polas ou especies vexetais.
- e. Talar ou podar árbores situadas en espazos públicos sen autorización municipal expresa.

- f. Arrancar ou partir árbores, pelar ou arrincar as súas cortizas, cravar puntas, atar a estes escaleiras, ferramentas, soportes de andamiaxe, ciclomotores, bicicletas, carteis ou calqueroutro elemento, trepar ou subir a estes.
- g. Depositar materiais de obra sobre as árbores ou verter nelas calquera clase de productos tóxicos.
- h. Botar en zonas axardinadas lixo, residuos, cascallos, pedras, papeis, plásticos, graxas, productos cáusticos ou fermentables ou calqueroutro elemento que poda danar as plantacións.
- i. Prender lume, calquera que sexa o motivo, en lugares que non estean expresamente autorizados.

#### **ARTIGO 109.**

Se nalgún caso cumprise arrincar ou trasladar unha ou varias árbores dun macizo de xardín, pola modificación da superficie pavimentada dunha rúa, o concello replantará ou substituirá estas árbores.

#### **ARTIGO 110.**

Todas as árbores, de calquera rúa ou propiedade pública, próximas a unha escavación ou construción de calquera edificio, estrutura ou obra na rúa, deberá defenderse cun valado de 1,20 m. de altura e 2,40 m. de lado como mínimo. Todo lixo, cascallo, ou material de construción deberá quedar fóra do valado deixando libre a árbore.

#### **ARTIGO 111.**

A protección da tranquilidade e sosego que integran a propia natureza das zonas verdes, esixe que:

- a. A práctica de xogos e deportes se realice nas zonas especificamente acoutadas cando concorran as seguintes circunstancias:
  - 1. Poidan causar molestias ou accidentes ás persoas.
  - 2. Poidan causar danos ou deterioros ás plantas, árbores, bancos e demais elementos de mobiliario urbano, xardíns e paseos.

3. Impidan ou dificulten o paso de persoas ou interrompan a circulación.
4. Perturben ou molesten de calquera forma a tranquilidade pública.
- b. As actividades publicitarias realizaranse con expresa autorización municipal.
- c. As actividades artísticas de pintores, fotógrafos e operadores cinematográficos ou de televisión, poderán ser realizadas nos lugares utilizables polo público.
- d. Deberán absterse de obstaculizar a utilización normal do parque e terán a obriga de cumprir con todas as indicacións formuladas polos axentes de vixilancia.
- e. As filmacións cinematográficas ou de televisión e a colocación ou transporte de materiais e instalacións de carácter especial para tales operacións, terán que ser autorizadas polo concello.
- f. As actividades industriais restrinxiranse ó máximo, limitándose a venda ambulante de calquera clase de produtos que soamente poderá efectuarse coa correspondente autorización municipal expresa para cada caso concreto.
- g. A instalación de calquera clase de industrias, comercios, restaurantes, venda de bebidas ou refrescos, xelados, etc, requirirá autorización ou concesión administrativa do concello, obtida coa tramitación que a normativa aplicable dispoña en cada caso concreto.
- h. Non sendo nos lugares especialmente habilitados, non se permitirá acampar, instalar tendas de campaña ou vehículos habilitados para tal efecto.

#### **ARTIGO 112.**

Nas zonas verdes non se permitirá:

- a. Lavar vehículos, roupas ou proceder ó tendido destas.
- b. Tomar auga das bocas de rega.
- c. Efectuar inscricións ou pegar carteis nos valados, soportes de alumeado público ou en calquera elemento existente nos parques e xardíns.
- d. Instalar calquera tipo de modalidade publicitaria nos parques. Nas restantes zonas verdes soamente se

autorizarán elementos publicitarios previamente homologados polo concello.

- e. Para realizar calquera clase de traballo de reparación de automóbiles, albanelería, xardinería, electricidade, etc. E de tratarse de elementos propios do parque ou de instalacións de concesionarios, requirirase a preceptiva autorización do concello.

### **ARTIGO 113.**

1. O mobiliario urbano existente nos parques, xardíns e zonas verdes consistente en bancos, xogos infantís, papeleiras, fontes, sinalizacións, farolas e elementos decorativos, deberá manterse no máis adecuado e estético estado de conservación. Os causantes do seu deterioro ou destrución serán responsables non soamente do resarcimento do dano producido, senón que serán sancionados administrativamente. Tamén será sancionado quen facendo uso indebido de tales elementos prexudique a boa disposición e utilización destes polos usuarios de tales lugares. Para estes efectos non se permitirá un uso inadecuado de bancos e xogos infantís.
2. Os papeis deberán depositarse nas papeleiras e os usuarios deberán absterse de toda manipulación sobre elas como movelas, volcalas ou arrincalas, ou facer inscricións ou adherir papeis e outros actos que deterioreen a súa presentación.
3. Os usuarios deberán absterse de realizar calquera manipulación das fontes que non sexa a propia do seu funcionamento normal así como a práctica de xogos.

Nas fontes decorativas, bocas de rega etc, non se permitirá beber, utilizar a auga destas, bañarse ou introducirse nas súas augas, practicar xogos, así como toda manipulación dos seus elementos.

4. Nos sinais, faroles, estatuas e elementos decorativos, non se permitirá subir, ou facer calquera acción ou manipulación, así como calquera acto que ensucie, dane ou deteriore a estes.

## **TÍTULO III**

### **RÉXIME DISCIPLINARIO**

### **ARTIGO 114.**

Calquera persoa natural ou xurídica poderá denunciar as infraccións en relación coas zonas verdes. As denuncias, nas que se expoñerán os feitos considerados como presuntas infraccións, darán lugar á incoación do oportuno expediente. A súa resolución será comunicada ós denunciante.

#### **ARTIGO 115.**

Consideraranse infraccións administrativas as accións ou omisións que contraveñan o establecido neste libro, clasificándose en leves, graves e moi graves.

a) Consideraranse **infraccións leves:**

- A existencia de posibilidade real de aproveitar recursos de auga.
- Deteriorar os elementos vexetais.
- Practicar xogos e deportes en sitios e de xeitos inadecuados.
- Usar indebidamente o mobiliario urbano.

b) Consideraranse **infraccións graves:**

- A reincidencia en infraccións leves.
- Destruír elementos vexetais.
- Causar danos ó mobiliario urbano.

c) Consideraranse **infraccións moi graves:**

- A reincidencia en infraccións graves.
- A celebración de festas ou actos públicos ou competicións deportivas sen autorización municipal.
- Usar vehículos de motor en lugares non autorizados.

#### **ARTIGO 116.**

Sen prexuízo de esixir cando proceda a correspondente responsabilidade civil ou penal, as infraccións dos preceptos deste libro serán sancionadas da forma seguinte:

As leves con multas de 30,05 €.

As graves con multas de 30,05 a 60,10 €.

As moi graves con multas de 60,10 a 90,15€.

A contía das sancións graduarase tendo en conta a gravidade do dano realizado, a intencionalidade, a reincidencia e demais circunstancias que concorran.

## **LIBRO V**

### **PROTECCIÓN DOS RECURSOS HIDRÁULICOS DA CONTAMINACIÓN POR VERTIDOS NON DOMÉSTICOS**

#### **TÍTULO I**

#### **DISPOSICIÓN XERAIS**

##### ***ARTIGO 117.***

É obxecto deste libro a regulación dos vertidos non domésticos de augas residuais procedentes das instalacións emprazadas no termo municipal, dirixida á protección dos recursos hidráulicos e á preservación da rede de sumidoiros e das estacións depuradoras de augas residuais.

##### ***ARTIGO 118.***

Sen prexuízo do que se establece neste libro, os dispositivos de evacuación de vertidos, as conexións á rede de saneamento e, en xeral, as instalacións para esta finalidade axustaranse ás normas específicas que os

regulen.

## **TÍTULO II**

### **VERTIDOS NON PERMITIDOS**

#### **ARTIGO 119.**

Quedan totalmente prohibidos os vertidos directos ou indirectos á rede de saneamento de todos os compostos e materias que se sinalan de seguido:

- a. **Mesturas explosivas:** líquidos, sólidos ou gases que por razón da súa natureza ou cantidade sexan ou poidan ser suficientes por si mesmos ou en presenza doutras sustancias de provocar lume ou explosión.
- b. **Restos sólidos viscosos:** Restos sólidos ou viscosos que provoquen ou poidan provocar obstrucións na rede de sumidoiros ou interferir no adecuado funcionamento do sistema de augas residuais.
- c. **Materiais coloreados:** Líquidos, sólidos ou gases que provoquen corrosión na rede de saneamento ou nas instalacións de depuración e tódalas sustancias que poidan reaccionar coa auga para formar produtos corrosivos.
- d. **Materias nocivas e sustancias tóxicas:** Sólidos, líquidos ou gases en cantidades tales que por si sos ou por interacción con outros restos, poidan causar molestia pública, ou perigo para o persoal encargado do mantemento e conservación da rede de colectores ou estacións depuradoras.

## **TÍTULO III**

### **INSTALACIÓNS DE PRETRATAMENTO**

#### **ARTIGO 120.**

1. Para os casos nos que sexa esixible unha determinada instalación de pretratamento dos vertidos, o usuario deberá presentar proxecto dela ó Concello e información complementaria ó respecto, para a súa revisión e aprobación previa, sen que se poidan alterar posteriormente os termos e especificacións do proxecto presentado.
2. Poderase esixir por parte do concello a instalación de

medidores de caudal de vertidos nos casos nos que non exista fiabilidade nos datos ou estimacións facilitados polo usuario.

3. O usuario será o responsable da construción, explotación e mantemento das instalacións necesarias, con obxecto de satisfacer as esixencias deste libro. A inspección e comprobación do funcionamento das instalacións é facultade e competencia do concello.

#### **TÍTULO IV**

##### **DESCARGAS ACCIDENTAIS E CONTROL DOS VERTIDOS**

###### **ARTIGO 121.**

1. Cada usuario deberá tomar as medidas adecuadas para evitar as descargas accidentais de vertidos que infrinxan o presente libro, realizando as instalacións necesarias segundo os criterios establecidos no artigo anterior sobre instalación de pretratamento.
2. De producirse algunha situación de emerxencia, o usuario deberá comunicar á Administración tal circunstancia, co obxecto de que esta tome as medidas oportunas de protección das súas instalacións. Seguidamente remitirá un informe completo detallando o volume, duración e características do vertido producido, así como as medidas adoptadas en previsión de que se produza de novo.
3. A Administración terá facultade de investigar as responsabilidades en que se puidese incorrer en cada caso.

###### **ARTIGO 122.**

Ante unha situación de emerxencia ou con risco inminente de producirse un vertido inusual á rede de saneamento que poda ser potencialmente perigoso para a seguridade das persoas ou instalacións, o usuario deberá comunicar urxentemente a situación producida e utilizar todas as medidas de que dispoñan coa fin de conseguir minimizar o risco. Posteriormente o usuario remitirá ó concello o correspondente informe.

###### **ARTIGO 123.**

Toda descarga de augas residuais, non domésticas, á rede de saneamento deberá contar coa correspondente autorización ou permiso de vertido, concedido polo concello.

#### **Artigo 124.**

1. Os usuarios que teñan que efectuar vertidos á rede de saneamento solicitarán ó concello o permiso indicado no artigo anterior.

2. Coa solicitude deberá xuntarse a seguinte información:

- Nome e enderezo da entidade xurídica solicitante, así como os datos de identificación do representante que efectúa a solicitude.
- Volume de auga que consume a industria.
- Volume de auga residual e réxime desta, horario, duración, caudal medio, caudal punta e variacións diarias.
- Compoñentes e características das augas residuais.
- Planos de situación, planta, conduccións, instalacións mecánicas e descrición pormenorizada coa rede de saneamento con dimensións e situacións.
- Descrición da actividade, instalacións e procesos que se desenvolven.
- Descrición do produto obxecto de fabricación, así como dos produtos intermedios ou subproductos se os houber, indicando cantidades, especificacións e ritmo de produción.
- Calquera outra información que o concello estime necesaria.

3. O concello autorizará a descarga con suxeición ós termos límites e condicións que se indiquen.

4. A autorización poderá incluír os seguintes extremos:

- Valores máximos ou medios permitidos en concentracións e en características de augas residuais vertidas.
- Limitacións sobre o caudal e o horario das descargas.
- Esixencias de instalacións de pretratamento, inspección, mostreo ou medición, en caso preciso.
- Esixencias tocantes ó mantemento, informes técnicos e rexistros de planta en relación co vertido.
- Programas de cumprimento.
- Condicións complementarias que aseguren o cumprimento das condicións que establece este Libro.

5. O período de tempo de autorización estará suxeito a modificacións, se hai variacións por parte do propio vertido ou ben por necesidades do concello. O usuario será informado con antelación das posibles modificacións e dispoñerá de tempo de abondo de adaptación ó seu cumprimento.
6. As autorizacións emitiranse con carácter intransferible.

## TÍTULO V

### INSPECCIÓN E RÉXIME DISCIPLINARIO

#### **Artigo 125.**

Os servicios correspondentes do concello exercerán periodicamente a inspección e vixilancia das instalacións de vertido de auga á rede de saneamento con obxecto de comprobaren o cumprimento do disposto neste libro.

As inspeccións e controis poderán ser realizadas por iniciativa do concello ou por instancia dos propios interesados.

#### **Artigo 126.**

O usuario facilitará ós inspectores o acceso ás distintas instalacións, coa fin de que poidan proceder a realizar o seu cometido. Do mesmo xeito poñerán a disposición dos inspectores os datos, informacións, análises, etc. que estes lles soliciten.

#### **Artigo 127.**

Os inspectores deberán acreditar a súa identidade mediante documentación expedida polo concello. Non cumprirá a notificación previa das visitas que se efectúen en horas normais de funcionamento da actividade, e o usuario debe facilitar o acceso ás instalacións.

#### **Artigo 128.**

Levantarase acta da inspección realizada polo concello, cos datos de identificación do usuario, operacións e controis realizados, resultados de medicións e toma de

mostras e calqueroutro feito que se considere oportuno facer constar por ambas partes. Esta acta asinarase polo inspector e polo usuario a quen se lle fará entrega dunha copia.

### **Artigo 129.**

Os vertidos que non cumpran con calquera das limitacións ou prohibicións establecidas nos artigos anteriores, darán lugar a que o concello adopte algunha ou algunhas das medidas seguintes:

- Prohibición total do vertido.
- Esixir ó usuario a adopción das medidas necesarias para a modificación do vertido mediante un pretratamento del.
- Esixir ó responsable o pagamento de todos os gastos a que o concello tivese que facer fronte como consecuencia dos vertidos.
- Imposición de sancións.
- Rebocación da autorización de vertido.

Nos supostos de gravidade ou excesiva reiteración de infraccións o concello poderá cursar a correspondente denuncia ós organismos competentes.

### **Artigo 130.**

Considéranse infraccións administrativas as accións ou omisións contrarias ó establecido no presente libro. As infraccións clasifícanse en: leves, graves e moi graves.

#### **1- Infraccións leves:**

- a) Non facilitar ós inspectores municipais o acceso ás instalacións ou á información solicitada.
- b) Omitir a información sobre as características da descarga de vertido ou sobre cambios no proceso que afecte á esta.

#### **2- Infraccións graves:**

- a) Reincidencia en faltas leves.
- b) Falta de comunicación de situacións de emerxencia.
- c) Efectuar vertidos que esixen tratamento previo sen telo feito.
- d) Realizar vertidos sen permiso municipal.

#### **3- Infraccións moi graves:**

- a) Reincidencia en faltas graves.
- b) Realizar vertidos prohibidos.

### **Artigo 131.**

Sen prexuízo de esixir cando proceda a correspondente responsabilidade civil ou penal, as infraccións ós preceptos deste libro serán sancionadas do xeito seguinte:

- As leves con multas de ata 300,51€.
- As graves con multas de 300,51 a 601,01€.
- As moi graves con multas de 601,01 a 3005,06 € con proposta, no seu caso, de clausura da actividade.

Para graduar a contía da sanción terase en conta a natureza da infracción, a gravidade do dano producido, a intencionalidade, reincidencia e demais circunstancias concorrentes.

### **DISPOSICIÓN ADICIONAL.**

Facúltase á alcaldía-presidencia para dictar cantas normas sexan necesarias para o desenvolvemento da presente Ordenanza.

### **DISPOSICIÓN FINAL.**

Esta Ordenanza entrará en vigor ó día seguinte da súa publicación íntegra no *BOE da Provincia*.

## ÍNDICE

<b>Artigos</b>	<b>Páx.</b>
Preámbulo	2
Libro I: Protección da atmosfera fronte á contaminación por formas de enerxía.	3
Título preliminar	1-4 3
Título I: Perturbacións por ruídos	5-17 3
Título II: Perturbacións por vibracións	18-19 7
Título III: Réxime disciplinario	20-25 8
Libro II: Protección dos espazos en relación coa súa limpeza e retirada de residuos.	11
Título I: Disposicións xerais	26-28 11
Título II: Limpeza da rede viaria e outros servizos	29-39 11
Título III: Limpeza de edificios	40-45 14
Título IV: Retirada de residuos sólidos urbanos	46-69 17
Título V:	70-75 22
Título VI: Réxime disciplinario	70-75 22
Libro III: Tenencia de cans e outros animais domésticos	25
Título I: Disposicións xerais	76-78 25
Título II: Cans	79-92 25
Título III: Outros animais domésticos	93-97 29
Título IV: Protección dos animais	98-101 30
Libro IV: Protección de zonas verdes	32
Título I: Disposicións xerais	102-107 32
Título II: Protección do medio, elementos vexetais e mobiliario urbano	108-113 33
Título III: Réxime disciplinario	114-116 36
Libro V: Protección dos recursos hidráulicos da contaminación por vertidos non domésticos	38
Título I: Disposición xerais	117-118 38
Título II: Vertidos non permitidos	119 38
Título III: Instalación de pretratamento	120 39
Título IV: Descargas accidentais e control dos vertidos	121-124 39
Título V: inspección e réxime Disciplinario	125-131 40
Disposición adicional	43
Disposición final	43